

Oni kradu od vas



Korupcija u Bosni i Hercegovini se može riješiti ako građani ovo pitanje stave u prvi plan na izborima, i ako budu podržavali institucije koje su pokazale vjerodostojnu odlučnost da urade nešto u vezi ovoga problema, napisao je visoki predstavnik i specijalni predstavnik EU Valentin Inzko u kolumni objavljenoj u današnjem izdanju Nezavisnih novina.

“Korupcija košta desetine hiljada radnih mjesta jer potencijalni investitori neće ulagati svoj novac u zemlju gdje je mito toliko duboko ukorijenjeno u administrativnom i političkom sistemu,” napisao je visoki predstavnik i specijalni predstavnik EU.

“Korupcija razjeda tkivo svakodnevnog života u svakom dijelu Bosne i Hercegovine – kada doktori odbijaju da liječe pacijente dok im se ne da mito, kada studenti plaćaju da bi položili ispit, kada se građevinske dozvole izdaju tek nakon davanja skromnog poklona odgovarajućem službeniku.”

On je dodao i to da “ako ćemo krenuti za sitnim službenicima koji uzimaju manji mito, krenimo onda i za političkim veličinama koji pronevjeruju milione. Činjenica je da previše političara i odgovornih zvaničnika u Bosni i Hercegovini kradu i ne odgovaraju za to. Oni koji to čine kradu od vas.”

“Ured javnog tužioca BiH i Državni sud počeli su izvoditi zvaničnike pred sud zbog korupcije. Niko se neće iznenaditi da su Tužilaštvo i Sud istovremeno postali predmet intenzivne političke kritike,” navodi visoki predstavnik i specijalni predstavnik EU.

“Međutim, ohrabruje činjenica da su pravosudni organi na raznim nivoima, uprkos kritici i političkom pritisku, počeli da se bave pitanjem korupcije. Njima je potrebna svenarodna podrška da bi mogli nastaviti tu borbu i treba im glasna i praktična podrška svakog političara koji je ozbiljan u pogledu namjera da se očisti sfera javnog života.”

Visoki predstavnik i specijalni predstavnik EU naglasio je da “prosto nije istina da se korupcija ne može zaustaviti,” te je ukazao na činjenicu da su “zakoni i institucije tu – ali oni će promijeniti stvari samo ako se u temelju i odlučno promijeni fokus i pristup političke elite.”

On je rekao da ovu promjenu može ostvariti izborna tijelo.

“Birači će 3. oktobra imati zlatnu priliku da izraze svoje stavove o ovoj velikoj krađi. Ako građani usmjere svoj gnjev na političku akciju, biće moguće početi privlačiti značajne investicije u Bosnu i Hercegovinu, stvarati nova radna mjesta i smanjivati siromaštvo. Zbog toga moramo korupciju prioritetno rješavati na izborima.”

Tekst kolumne visokog predstavnika/specijalnog predstavnika EU dostupan je u cijelosti na www.ohr.int i www.eusrbih.eu.